



Broj: 05-16-49-87-6/15 ZJ
Sarajevo, 04.02.2016. godine

SKUPŠTINA KANTONA
- OVDJE -
n/r prof. Ana Babić, predsjedateljica

PREDMET: Odgovor na zastupničku inicijativu

Zastupnik u Skupštini Kantona Sarajevo, Sejo Bukva, na Devetoj Radnoj sjednici Skupštine Kantona Sarajevo, održanoj dana 21.12.2015.godine, u okviru tačke dnevnog reda "Poslanička pitanja, inicijative i odgovori", pokrenuo je slijedeću zastupničku inicijativu kako slijedi:

"moja inicijativa se odnosi na rad ugostiteljskih objekata u Kantonu Sarajevo, odnosno na prijedlog da objekti koji žele da imaju muziku uživo imaju mogućnost produženja radnog vremena".

ODGOVOR:

Ugostiteljski objekti u smislu Zakona o zaštiti od buke Kantona Sarajevo ("Službene novine Kantona Sarajevo" broj: 26/07) smatraju se izvorima buke, budući da najčešće koriste akustične uređaje sa ili bez pojačivača zvuka, a uz to predstavljaju mjesta gdje se okuplja veći broj ljudi koji mogu bučnim aktivnostima uticati na povećanje nivoa zvuka iznad dozvoljenih vrijednosti. Iz navedenih razloga Zakonom su propisane mjere čijom se primjenom osigurava zaštita od buke, koje podrazumijevaju adekvatnu zvučnu izolaciju prostora, ograničavanje broja izvora buke i rada tokom noći, upotrebu akustičnih uređaja, graničnih vrijednosti emisija buke u zatvorenim prostorima u ovisnosti od njihove namjene, kao i namjene okolnih prostora i njihove osjetljivosti na buku.. Sve navedene uslove zaštite od buke, dužan je uzeti u obzir nadležni organ prilikom donošenja dozvola i odobravanja obavljanja ugostiteljske djelatnosti u objektima. Članom 17. Zakona utvrđeno je korištenje akustičnih uređaja na otvorenom prostoru, kao i mogućnost da u posebnim situacijama (manifestacije sportskog i zabavnog sadržaja i sl.) općine mogu odlukom odrediti lokaciju na kojima je moguće prekoračenje dozvoljenih nivoa buke. Na sličan način ova materija je regulisana u svim susjednim zemljama.

U kontekstu predmetne inicijative, treba naglasiti, da su uslovi koje moraju ispunjavati ugostiteljski objekti utvrđeni i posebnim Pravilnikom o razvrstavanju i minimalnim uslovima ugostiteljskih objekata iz skupina "restorani", "barovi", "cetering objekti" i "objekti jednostavnih usluga" ("Službene novine FBiH" br.40/10), koji je donio federalni ministar okoliša i turizma na osnovu Zakona o ugostiteljskoj djelatnosti.



Članom 5. Pravilnika je definisano, da su vrste ugostiteljskih objekata koji mogu raditi noću samo noćni klub, noćni bar i disko klub. Takođe, je utvrđena i vrsta objekata gdje se može izvoditi živa muzika, kao i obaveze provođenja zaštite od buke u ugostiteljskim objektima u skladu sa posebnim propisima.

Što se tiče dužine rada ugostiteljskih i drugih objekata, ista se utvrđuje posebnim odlukama o radnom vremenu, koje se donose na općinskom nivou.

Iz navedenog se može konstatovati, da se zastupnička inicijativa ne može realizovati kroz donošenje novog Zakona o zaštiti od buke Kantona Sarajevo, jer se radi o materiji koju reguliše više propisa. Ono što će se dodatno razmatrati jeste član 7. važećeg Zakona o zaštiti od buke Kantona, kojim je utvrđeno da dan traje od 06 do 22 sata, a noć od 22 do 06 sati. Identično je definisano i u članu 7. Federalnog Zakona o zaštiti od buke ("Službene novine Federacije BiH" broj 110/12).

Kako federalni zakon, sa kojim se u Kantonu moramo uskladiti zbog podijeljene ustavne nadležnosti, nije propisao načine izrade karata buke, a i karata izloženosti uticajima industrijskih pogona, aerodroma, željeznice i sl., u novi Kantonalni Zakon o zaštiti od buke uveli smo set osnovnih indikatora buke neophodnih za te svrhe, a kojima je u duhu evropske regulative utvrđen drugačiji period trajanja dana, večeri i noći, koja podrazumijeva vrijeme od 23 do 07 sati.

U tom smislu imamo neusklađenost, koja je uočena i od poslanika prilikom razmatranja Nacrta Zakona o zaštiti od buke na Skupštini Kantona, koja će biti korigovana kroz izradu Prijedloga Zakona. Uz to, na nov i zahtjevniji način je utvrđena primjena mjera zaštite od buke u postupcima izdavanja dozvola i odobrenja, što podrazumijeva izradu stručnog mišljenja od strane specijalizovanih institucija, kojim će se obrađivati svi aspekti produkcije buke u ugostiteljskim objektima.

S poštovanjem,



MINISTAR

Čedomir Lukić, dipl.ing.arh.

Dostaviti:

- Naslovu
- Arhiva



web: <http://mpz.ks.gov.ba>
e-mail: mpz@mpz.ks.gov.ba
Tel: + 387 (0) 33 562-029, Fax: + 387 (0) 33 562-031
Sarajevo, Reisa Džemaludina Čauševića 1

